



Infurmaziuns dalla suprastanza communal da digl cumeegn Albula/Alvra:

### **Schaner/favrer 2020**

- A caschung dall'amprema seduta ò la suprastanza communal fixo igls termins per igl 2020. Igls projects planisos pigl onn current 2020 scu er las tractandas preveidas, èn neidas preschentadas e nudadas sen la glista dallas pendenzas tgi vign actualisada cuntinuadamaintg.
- Sa basond segl art. 5 cefra 1 paragraf 2 dalla lescha d'indemnisaziun digl cumeegn Albula/Alvra è igl pensum da lavour digl mastral nia dulzo da 45 % sen 50 %. Igls pensums per neir a freida cugl management da crisa n'èn betg cumpiglias ainten chest pensum.
- La suprastanza ò approvo diversas dumondas da biagier sen proposta dalla cumischung da biagier.
- Igl cumeegn Albula/Alvra è pertutgia antreas la midada da possessour dalla veia cantunala H417 e H3 an veia naziunala N29 da Tusang a Silvaplana. An connex cun la verificaziun dalla surdada da possess ò igl cumeegn Albula/Alvra approvo en credit an import da CHF 3'000 per la compra digl bagn immobigliar nr 5229 a Casti.
- L'alp Ozur da Casti è neida dada a tschains alla societad d'alp « Alp Ozur », tgi duess neir fundada danov. La societad d'alp sa cumpona da pours digl cumeegn Albula/Alvra.
- La suprastanza ò examino e surluvro igl plan directiv Parc Ela-Trek ed igl delibero per mang dalla Regiun Albula.
- La suprastanza ò piglia posiziun manedlamaintg davart la creaziun d'en'organisaziun turistica «Model da cooperaziun Grischun Central». La suprastanza sustigna la strategia elaborada ed igl posiziunamaint cugl Parc Ela scu basa comunabla.
- Igl termin per l'amprema radunanza communal igl 2020 è nia fixo per igls 20 da mars 2020.
- Sa basond allas experientschas fatgas anfignen ossa ed allas ancunaschientschas fatgas danov davart las examinaziuns detagledas dalla «Sbuvada dalla vischnanca», duess neir elaboro en concept d'examinaziun correspondent er per la «Sbuvada dalla muntogna». Per las examinaziuns detagledas ò la suprastanza delibero en credit brut an import da CHF 3'750'000.00 per mangs dalla radunanza communal digls 20 da mars 2020. Confederaziun e cantun on siero ena contribuziun da 90%. Igls 10% costs restants vignan finanzti digl cumeegn, digl uffezi da construcziun bassa e dalla Veiadafier Retica.

- La supranza è delibero en credit da CHF 270'000.00 per la compra d'en nov vehichel communal (ramplazza igl vehichel communal digl 1989). A caschung dalla proxima radunanza communal vign la dumonda da credit sottomessa all'approvaziun.
- La supranza è surdo alla firma Florinett SA, Barvogn, las lavours d'urbarisaziun an connex cugl project «Revitalisaziun dalla Landwasser».
- Per surpiglier igls costs restants (30%) digl tagl da lenna «Arsa», territori da pastgira dall'Alp Nova a Stierva, è la supranza concedia en credit da CHF 9'620.25.
- La supranza è approvo e delibero la glista da tractandas ed igl messadi definitiv per la radunanza communal digls 20 da mars 2020.
- La supranza è piglia cunaschientscha dall'analisa detagleda davart igl abitar cun prestaziuns da sarvetsch ad Alvagni. Igl autour dall'analisa recumonda a basa dallas ancunaschientschas da concretisar igl plan fatg a sies taimp per la construcziun d'abitaziuns adattadas alla vigliadetna.
- An connex cun la sanaziun dall'equipaziun da gôt a Sulom-Lueras ad Alvaschagn èn igls contracts da barat e da compra nias examinios ed approvos.
- Per expensas supplementaras cumpruvadas an connex cun la zavrada dallas zonas da protecziun da funtangas è nia approvo en credit supplementar da CHF 20'000.00.
- Igl sistem da drenascha a Propissi/Pigni è nia construia igl 1906/1907 scu maseira da sanaziun per las activitads dalla bova sur Brinzauls e sano igl 1978. Siva d'alloura èn neidas fatgas nignas lavours da mantignamaint ple. Igl 2020 duess chel sistem da drenascha neir restatua. Per la retschertga ed elaboraziun dalla basa da datas e plans geologics e hydraulics è la supranza delibero en credit brut da CHF 26'000.00 e per l'elaboraziun d'en concept da maseiras en credit brut da CHF 29'000.00. Confederaziun e cantun sa participeschon agls costs totals per la reparaziun digl sistem da drenascha Propissi/Pigni cun 75% anfignen 90%.

La supranza communal